

TIMOTINYI

Paul gv Siti Jichonam

Mintamchonam

Timoti, Asia Mainor lokv vmi yaapa kristan go, ninyigv Anv ngv Jius go okv Abu hv Grik go. Nw Paul gv misionari kudungkua riku lo ridorla reming gvnvgo. Paul gv Timotinyi siti jichonam si gaam aom gulo minggingdo.

Siti si mintu minke bv gvrja lo mvvla tamsarnv vdwa gamrwnam go. So tamsarnam si Jius gvla Jiusmanv gv rinamvngnama mio minchila minam go. Tanyi mooku si alvmanv ngv okv nyi si ringlin nama paanam lvgabv arwnglo chinchi manamgo doodu um chinla ila okv dvnamtvnngnam megonyi dvmatvngma laila okv nywngnyilu naami sima laila ringlin nama paamwngre vnamgo. Siti si gvrja nga rigvdakgv see okv kumsejose gaam minsartamsarnam vkv doodu, okv gvrja nga rigvdogvnnv okv ridurnv oguaingnv mvngnamsaknam ha gvla rise ngvdw vkvnnv gaam vkv doodu. Minyabvku, Timotinyi oguaingbv Jisu Kristo gv alvnnv pakbu bv rise ngvdw okv mvngjwngnv nyi nyitwng-nyitwng nga oguaingbv kaalatala rigvdogv svngvdw um tamsarnam gaam vkv doodu.

Arwng lokv darlinnam

Mintamchonam (1:1-2)

Gvrja gvla hogv rigvdogvnnv vdwa minam (1:3-3:16)

Timotinyi ninyigv kudungkua lvkwngbv minam (4:1-6:21)

¹ Ringnv Pwknvyarnv gv orto lokv okv ngonugv mvngtin kunam Kristo Jisu gv apostol akobv rin v Paul gvlokv—

² Mvngjwng lokv ngoogv jvjvnnv kuunyilo bv rin v Timotinyi:

Ngonugv Abu Pwknvyarnv okv Kristo Jisu ngonugv Ahtu nam anyubv aya nga okv sarsopoyo nga jigv nyika.

Mvvlarula tamsarnv vdwa gamrwnam

³ Ngo Mesedonia bv vngla lamtvlo nam minam apiabv, ngo nam Epesus lo dootoka vla mvngdunv. Nyi mego vka mvvnam doin vkv tamsar nyadu, okv no bunua mingku mabvka vla orto jirung toka. ⁴ Bunua krim gv minjarminbo bv minam higu okv abuapa nwdw lvkkum pvvnam vdwa kayu toka vla mintoka,

hv nyi vdwa larmi simu nyumdo, Pwknvyarnv gv runnam lo rijivngji madu, um mvngjwng lokv chindu. ⁵ So ortojinam gv lvkwng ngv haapok darwknv lokv, mongrumara abwknam lokv okv tarwkbaak bv mvngjwngnam lokv aanv pakmi sinam ha kaiyaya modubv rinam go.

⁶ So vdw sokv nyi mego vngkur nyapvku okv pvchabv gaam raaku lokv bunugv lamtv nga ngoomu nyaroku. ⁷ Bunu Pwknvyarnv gv Pvbv nga tamsarnvbv ridubv mvngdu vbvritola bunu atugv gamchar vdwa vbvmajeka bunugv jvjvnnv aingbv mvngpakla raagv dnam gaam humka bunu chima.

⁸ Ngonu chindu Pvbv si alvvnngv um oguaingbv rin v svngvdw vbvrinv nvbolo. ⁹ Si mvngpa

rungsego, Pvbv si alvny nyi vdwgv lvgabv mvma, vbvritola Pvbv nga mvwkmvrwknv okv dvchotvnglanv nyi vdwgv lvgabv, Pwknvyarnvni chimanv okv rimurnv okv yvbunudw dormo mani madunv okv vmalo yalu lvgabv mvngmanv, anvabu ha pakipamarnv vdwgv lvgabv, gwngrw gwnv vdwgv lvgabv, ¹⁰ yoomurchomurnv vdwgv lvgabv, nyimv anying nyilo anying rimisin vdwgv lvgabv, nyi naasin vdwgv lvgabv, yvbunudw nyi gv lvgabv mvvla mirianv vmalo yvvdw jvjvny doin ha akusubv kudungkua rin vdwgv lvgabv. ¹¹ Ho gv doin ha gamlv lo paadu um nga minggo kardubv mintoku, kairungnv okv bokta rungny Pwknvyarnv gvlokv Alvny Yunying ngv.

Pwknvyarnv gv anyubv Paknam ha umbonyikv vnam

¹² Ngo Kristo Jisu Ahtunyi umbonyikv vdunv, nw ngoogv kudungkua lvgabv nga gwlvk ha jiyadu. Ngo ninyia ngam ninyigv nyi gubvrila dubv okv ninyia rijikodubv naalwk kunam lvkwngbv umbonyikv vdunv, ¹³ kvvlo kvcho ngo ninyia alvmabv minla okv mvdwkmvku la okv nyarjikaula rin vdwgv rijeka. Vbvrilitola Pwknvyarnv ngam paknyu bv pakla ogulvgavbolo ngo hoka mvngjwng dootv madvto okv vkvlgabv ngo ogugo ridu nvdw um chimato. ¹⁴ Okv ngonugv Ahtu kairungnv gv aya nga ngoogvlo pwlwk jitoku okv Kristo Jisunyi akin laikula ngonu gvvrinv mvngjwng okv paknama ngam jitoku. ¹⁵ Si jvjvny minamv, mvnwngnga torwk sise ngv okv mvngjwng rungse

ngv: Kristo Jisu nyiamooku so itoku rimurnv vdwa ringdubv. Bunugv lokv ngo alvmaya choknv, ¹⁶Vbvritola Pwknvyarnv ngam achialv bv ayato, vbvrinam hv Jisu Kristo gv ngam ninyigv saktv mvnwngnga lvkobv kaatam modubv alvmaya choknv nga, kochinglo yvvbunudw ninyia mvngjwng redw turbwngnv singnam ha paamu dukubv kaagvsidubv rinam goku. ¹⁷Turbwngnv Kvvbinyi, vdwloka simanv okv kaapa manam, Pwknvyarnv akin–ninyia mvngdv kunam mv okv kaiyachok namv dvbvsingtambv doobwng laka! Amen.

¹⁸Ngoogv kuunyilo Timoti nga nam ngo so gaam sum mindunv no alvbv mvmi sunam lvgabv kvvlo gv nogv lkwnglo nyikrw gaam minam vdwa no minla rila yidu gubv minv nvlaka, ¹⁹okv nogv mvngjwng okv mvngdarsakdar sinamlo pwbwng suto laka. Nyi tunggonv bunugv mvngdarsakdar haatin simanam lokv okv mvngjwng ngv haatin simanam lokv bunugv mvngjwng nga ngemu nyadu. ²⁰Bunugv ara lokv Haimenias okv Alekjendar, bunyia ngo Uyu gv laaklo laklwk la mvrit pvnv; svbvrinam si bunyia lvkodv Pwknvyarnvnyi minyingmiru mimu kuma dukubv ripvnv.

2

Gvrja lo Kunamjonam

¹Vbvrikunamv ngo mintumingke bv mintvmirula lvbula mindunv, kunnam ha kumji nama okv umbonyikv nga nyi mvnwng lvgabv Pwknvyarnv gvlo tolwk jilaka vla mindunv; ²dvbv vdwgv lvgabv okv yvvbunudw rigvdakgv nvbv

ridunv ho vdwgv lvgabv vkvlvgavbolo ngonu mvnwng gv renamdonam mv Pwknvyarnvnyi mvngdvla yumsum okv sarsopoyola alvyaungbv rebamdakbamla singbam dubv. ³ Si alvvnvgv okv si Pwknvyarnv nyila ngonua ringlin kunvnyi mvngpu more, ⁴ hv mvnwngnga ringlin kunam gubv risego okv jvjv lo aalakula chinsego vla mvngdu. ⁵ Vkvlgva Pwknvyarnv ngv akin okv Pwknvyarnv nyila nyiakuu vdwa naadum sinv akin nyi go, ho nyi angv Kristo Jisu, ⁶ hv atubongv nyia kuu vdwa rvvlin dukubv tolwk sitoku. Vbvrinam hv Pwknvyarnv alvnnv dw lo nyichar mvnwngnga turmu dukubv ripv vla kaalin moduku, ⁷ okv vkvlvgabv nga apostol akobv okv tamsarnvbv Jentail vdwgvlo vngmupvnnv, mvngjwng okv jvjvgv doin ha jappo modubv. Ngo mvvla mima; ngo jvjv nga mindunv!

⁸ Gvrja lo kunnamjonam mvnwnglo Pwknvyarnv gvlo tolwklaklwk sinv nyiga vdww haachinam vmalo larmi sunam kaamabv laak kv idung gvrila kumto laka vla ngo mvngdu. ⁹ Ngo nyimv vdwaka vjivbee nga darwk alvbv hinlakaala kaalwktaak bv gvvtoka vla mvngdu; jeenamngamnam bv dumpo dwmw am gvmabvka vmalo gvvmingvvin bv gvvnamm am ain lokv gvyoka, vmalo kaibv arv doonv kooji gvyoka vmalo achialvbv arv doonv vjivbee gvyoka, ¹⁰ vbvritola dormo rinamdaknam lo alvnnvgobv mvngsunv nyimv vdww, alvnnv kudungkua rinam lokv kaalwktaak nam gubv ridu. ¹¹ Nyimv vdww nyaknyibv okv choibv tvvsar sirung laka. ¹² Ngo

bunu vdwa tamsar dubv vmalo nyilo vdwa rigvdubv jima dunv; bunu choi rungto laka. ¹³ Ogulvgavbolo Adamnyi pwkcho tvla kochingbv Iyipnyi pwkto. ¹⁴ Okv Adamnyi kupnam kaama; Iyip nyiya kuptoku okv Pwknvyarnv gv pvvv nga dartung motoku. ¹⁵ Vbvritola nyimv ngv kuu* bvngnam lokv ringnam †ha paareku, hv hinlakaala alvvv mvngjwng bolo, okv pakbolo okv nyaknyila darwk bolo.

3

Gvrja lo Rigvdoogvnnv vdwv

¹ Si jvjvnnv gaam mv: yvvdw gvrja nga rigvdogv nvgobv rinwng doodw, hv achialvvv alvnnv kudungkua nga rinwng kunam mv. ² Gvrja nga rigvdogvnnv nyi hv rigakpama nvgobv rirungdubv ridu; hv nywng* akin mvngdubv ridu, hv himasunnv gubv, saktv nvgobv okv hinlwkkmaalwk nvgobv rirungdubv ridu; hv nyebunyi a atubogv naam lo alvvv aamu nvgobv rirungdubv ridu; hv tamsar lanv gobv rirungdubv ridu; ³ hv tvngkium dvkium nvgobv vmalo yalungyachung dunv gubv rirung mase ngv, vbvritola damdv okv sar-sopoyo nvgobv rirungdubv ridu; hv morko nyilin nvgobv rimarungdubv ridu; ⁴ hv atubogv vpin ha alvvv nyingji lanv gubv rirungdubv ridu okv ninyigv kuu vdwa ninyia ogumvnnwnglo mvngdv

2:13 Atk 2:7; Atk 2:21,22 **2:14** Atk 3:1-6 * **2:15** kuu dola turnamha paare; Vmalo kuu donam lokv ringnam a paare † **2:15** nw tvlik dubolo Vmalo bunu vdwv tvlik dubolo **3:2** Tai 1:6-9
* **3:2** nywng akin go domwng laka; Vmalonyimvnyilo namisinam a lvkin go rimwng laka

jinam gubv rirungdubv ridu. ⁵ Vkvlvga nyiga gunv atubogv vpin ha nyingji nyuma nvngv hv oguaingbv Pwknvyarnv gv gvrja nga rigvdogv nyuladubv? ⁶ Hv mvngjwnglo kamnv gubv ridubv rirungdunv, ogulvgavbolo hv Uyudvbv aingbv rila goosula miakaya koola gilv nvgobv rima dubv. ⁷ Hv hinying paamanam lvgabv bv okv Uyudvbv gv amin lo holwk manam lvgabv hv gvrja arwnglo okv agum lojvka nyi vdwg v mvngdvnam gubv rirungdubv ridu.

Gvrja lo Riduryanv vdwv

⁸ Gvrja lo riduryanv ka alvny nyi bv okv hindum sinv gubv rirungdubv ridunv; bunu achialvbv anggor ala tvngkium nvbv morko dvgum nvbv rima rungubv ridu; ⁹ Bunu ogu mvngbwkgolo manam kaamabv mvngjwng gv jvrv nga kaatam nama gakbwngchvkwng nvbv rirungdubv ridu. ¹⁰ Bunua gwngkarika gvrila kaakw chorung laka okv vbrikunamv bunu gvlo ogu alvmanv go himpakaapa mabolo bunua gvrja lo riduryanv gubv rimutvka. ¹¹ Bunugv nywng[†] vdwvka himasunv gubv rirung dubv ridu okv rwsitanu japma nvgobv ridubv rirungdo; bunu ogumvwnwnglo nyaknyi okv mvvmaruma nvbv ridubv rirungdo. ¹² Gvrja nga riduryanv nyi ngv nywng ‡akin mvngdubv rirungdo, okv atugv vpin okv kuu vdwg v lvgabv alvbv nyingla nvgobv rirungdo. ¹³ Vbvrinv gvrja lo riduryanv nyi ngv bunu atugv kudungkua nga alvbv risu bongv nyi alvnygobv

† **3:11** bunugv nywng vdwv; Vmaloridurnv nyimv vdwv ‡ **3:12** nywng akin go domwng laka; Vmalo nyimvnyilo namisinam a lvkin go rimwng laka

rinyala bunugv Kristo Jisunyi mvngjwng namgv lvkwng nga busukano kaamabv minladunv.

Arwnglo Kairungnv go doolwkdu

¹⁴ Ngo nam baapubv kaarwk sidubv vla mvngtin dula sum siti sum nam vbv lvkdunv.

¹⁵ Vbvritola ngoogv aanam mv tapv nambv ridaka, si siti si ngonu oguaingbv Pwknvyarnv gv vpinlo ouguaingbv risedakse ngvdw nam chimure, ho vpin hv turbwngnv Pwknvyarnv gv gvrja ngv, jvjv nga turbudalv yanv gv gvngnga pongv.

¹⁶ Ngonugv dormo si arwnglo vdwgo kairungnv gubv ridudw, hum yvvka mia lama:

Hv nyi amarbv kaatam sito,

Dow lokv tarwkbak dunv vla kaatam sito, §
okv nyidogindung vdwv ninyia kaapato.

Ninyigv lvkwng nga chvnggodogo lo mingojito,
chvnggodogo mvnwngngv ninyia mvngjwng
nyato,

okv nyidomooku tolo naacha toku.

4

Mvylarula tamsarnv vdwv

¹ Kochinglo nyi vdwv megonv mvngjwng nga ngoomu nyare vla Darwknv Dow hv rvbwngvrwngbv mindo; bunu mvvnvrnv dow nga tvvyare okv uyuvram vdwgv tamsar namlo vngya reku.

² Mvvnvrnv vdwv vkvnnv tamsar ha dusit karmu reku, bunugv mongrumara ngv riokdar agu nvlo baanam apiabv, atamanam riku.

³ Vkvnnv nyi vdwv vbv tamsar nyado

§ 3:16 dow lokv tarwkbak nvgobv kaatam toku; Vmalo okv, dowjwklo lokv tarwkbak nvgobv kaatam toku

nywngnyilu naami sunam si rimur v okv dvnamtvngnam dvmatvngma svngv ka doodunv vla, vbvritola Pwknvyarnv ho dvnamtvngnam vdwa dvdutvngdubv pwkpvnv, mvngjwngnv vdww okv jvjv nga chinv nyi vdwwv umbonyikv vla kumro bv dvla dunv, ⁴ Pwknvyarnv gv pwknam ogumvnwng ngv alvdo; akoka toa jinam kaama, vbvritola ogumvnwngnga umbonyikv vla naarwk sidubv ridu, ⁵ ogulvgavbolo kumnam okv Pwknvyarnv gv gamchar hv um Pwknvyarnv gv torwksinam gubv mvdukunv.

Kristo Jisu gvlo alvnnv pakbu gubv rinam

⁶ So gv minam vdww sum no mvngjwngnv vdwa alvvv minji dubolo, vbv no atubogv yalu gv singdung gv gamchar lokv dvmwkrimwk sula okv jvjv nga tamsar nama riminggvdubolo, no kristo gvlo alvnnv pakbu gobv rire. ⁷ Vbvritola krim gv anyung kaamanv higuahirak vkvnnv lokv no adu sito laka. No atubongv yalu gv singdung yalo risarrima suyala reto laka. ⁸ Amar lokv gwlvk rungbv kudungkua rinam mv arv mego doodu, vbvritola yalu lo gwlvk rungbv kudungkua rinam mv mvnwnglo arv doyado, ogulvgavbolo si vjak gvla kokwng gv lvgabv singdung go milv jidu. ⁹ Si jvjvbv minamv, mvnwngnga torwk sise ngv okv mvngjwng runge ngv. ¹⁰ Ngonu rilv kumabv ridu okv raaitungtung* bv kudungkua ridu, ogulvgavbolo ngonugv mvngtin ha turnv Pwknvyarnv gvlo tinlvkdu, hv mvnwngnga Ringnv

* **4:10** raaitungtung; Megonv kitaplo dooduvdww mvkok roku.

go vbvritola jvjvbw minbolo yvvbunudw ninyia mvngjwng dukunv ho vdwgwbv.

¹¹ So gv minam vdw sum okv tamsarnam vdw sum bunua jito laka. ¹² No nyipayapa bv ridu vla yvvnyi yvvnyika kaajaptariap koyoka, vbvritola no gv japnam lokv, no gv rinam doonam lokv, no gv paknam lokv, mvngjwng lokv, okv darwknam lokv mvngjwngnv vdwa kaagv kodubv rito laka. ¹³ Ngoogv aama dvdvlobv, no noogv dwa nyi vdwa Darwknv Kitap ha puri rijila, doin ha japjinam lo okv tamsar namlo jilwkla rito laka. ¹⁴ Mvngjwngnv chinmanv vdwv laak kv ipo tvla okv nyijwk kv gaam bv minla yalu gv jinyubv amin jinam ha jilwk mola no gvlo doolwk nvnga no mvtor siyoka. ¹⁵ No gv alvbv rinam ha mvnwngnga kaapa monam lvgabv, no so vdw sum risarrima la mvnggap dvdv laka. ¹⁶ No atubongv la okv no gv tamsar nama hinlakaalaka. Vbvvdvdbv ribwng tolaka, ogulvgavbolo no vbvdvdbv ribolo, no atubongv la okv nam tvvyanv vdwaka ringnam gubv rire.

5

Mvngjwngnv vdwa Rigvdoogv svngv

¹ Nyiga yanv nga yamma bvka, vbvritola ninyia no gv abu aingbv mvnggv rila alvbv minto laka. Nyipayapa yanv vdwa no gv boru aing gubv mvnglaka, ² hungu vdwa anv aingbv, okv mvngado vdwa bormv aingbv mvngla darwkbv reladolaka.

³ Rinamdaknam mvnwnglo akin bv rinvdaknv hvngmi vdwa mvngdv kaatam laka. ⁴ Vbvritola

hvnngmi ngv kuu vmalo kuu gv kuu sida go doodu bolo, hv bunu atuakebv bunugv dormo ridung nga chirung segorung bunu atugv vpin lvgabv okv vbvrila bunugv anvabu vmalo at-uayu gv ritungvngtung nga richivngchi gvdu kubv, ogulvgavbolo vbvrinamv Pwknvyarnv gv kaalwk namv. ⁵ Hvnngmi ngv yvvdw, ninyia rigurriyin yanv kaamabv ajinkaama doodunv, ninyigv mvngtin nga Pwknvyarnv gvlo tinlwkla, okv ridur nam lvgabv koola okv aluayo bv kumbv-la ridu. ⁶ Vbvrিতোলা hvngmi ngv yvvdw atubogv hvriok lvgabv rin v angv turla doojekuka hv siro pvkunv. ⁷ So gv minam vdw sum bunua minji toka vbvrila yv vka bunugv lvkobv rimur go kaapa madubv. ⁸ Vbvrিতোলা yv vka bunugv haalung nga kaayataya madunv, minjvjbolo bunugv vpinvriap vdwv, bunu mvngjwng nga toa duku okv mvngjwng manv yanga alvmaya duku. ⁹ Hvnngmi hv vdwlo ninyigv singnam mv anying chamkvma dvdvlo hum hvngmi vdwa lvkkum kolo lvklwk mabvka. Mindvdunv, hv nyilu naanam mv lvkin mvngnv goka * ¹⁰ okv albv rinamdaknam ha tvvpakaapa kunam gubv rin v gorungbv: ninyigv kuu vdwa albv sochanv nyimv gubv rinvgurungbv, ninyigv naam lo nyen ha albv naarwk sinv gubv, kvvbi kristan vdwa nyaknyi albv kaatam ritam kunvgobv, nyi vdwgv adwkaku akolo ridur nvgobv, okv atubongv alv v kudungkua lo tolwklaklvk sinv gubv rirung nvgobv.

¹¹ Vbvrিতোলা hvngmi nyijar bv rin v nga

* **5:9** nyimvnyilo lvkin go naamwng laka; Vmalo nwg v nyilua ribomabvka

hvnngmi vdwa lvkkum kolo lvklwk mabvka; ogulvgavbolo vdwlo bunugv mvngjimvngro ngv bunua lvkodv nyilu naanwng mobolo, bunu Kristo gvlokv adu duku, ¹² okv vbvrila kvvlogv ninyia milv kunam vdwa mvyaklakula rimur duku. ¹³ Bunu naam gonv lokv naam gonvlo vnggokarla dw nga ngoomu nama ka risarsidu; vbvritola umka alvmayabv, rwsj japnam okv atugv ayak ha doonudaknu jimabv rila, mima sengaka minam vdwa risarsidu. ¹⁴ Vkvlgabv hvngmi nyijar vdwa nyilu naala, kuu doola, okv bunugv naam ha ringchumyala, ngonua nyirunv vdwa alvmanvbv minku mabvka vla ngo mvngdunv. ¹⁵ Ogulvgavbolo hvngmi megonv Uyu nyi vngmi gvdu kubv vla dakkur nyaroku. ¹⁶ Vbvritola kristan nyimv gonv vpinlo hvngmi mego doodubolo, hv bunua kaayataya runglaka okv ho vdwa gvrja nga parlwk yoka, vbvrila hvngmi ajin kamabv doonv vdwa gvrja ngv kaayataya nyudukubv.

¹⁷ Chinmanv vdvw yvnbunudw rigvdogv nvgobv rila japgola okv tamsarla alvnv kudungkua nga raitungtung bv ridunv, hv bunu dorma nga anyigo paala dunv. ¹⁸ Ogulvgavbolo Darwknv Kitaplo mindu, “Vdwlo no hvvpu ha aam swkmv tvvrinyi gaam a puutum mabvka” okv “Kudungkua rinv nga dorma nga jirung sego.” ¹⁹ Tvyakayanv nyidum anyi gomalo achialv nvgobv rima loka chinmanv akonyi gungnying milwkla minam ha tvjwng mabvka. ²⁰ Rimurnv mvnwngnga kvba tvvpamlo yamtoka,

vkvlvgavbolo kvbi vdwwka busu dukubv.

²¹ Pwknvyarnv gvla Kristo Jisu gvla okv darwknv nyidogindung vdwgv kaagialo ngo nam dinchirungbv mindunv no yvvnyika mvngdv mvngsa namgo kaamabv so gv minam vdw so tvvla rirunglaka. ²² Pwknvyarnv gv kudungkua nga rimunam lvgabv nyi vdwa baapubv laak kv laklin dala tolwk dubv riyoka. Kvvbi gv rimur a riming gvmabvka; atubongv darwkchongjor bv vvpv sulaka. ²³ Noogv ayak kv lvvma maadv-maadv gvvre, vkvlvgabv no isi ha tvngmwng mabvka, noogv dvnamtvnngnam hv ayak aanam lvgabv no anggor ala lo achukgo tvnglaka.

²⁴ Nyi megonvgv rimur v kaadatara dubv rido, okv bunugv rimur v vngchoyala jwngkadaka dubv vnglwckhodu; vbvritola kvvbi gv rimur vdwv kokwnglo kaapa mvngdo. ²⁵ Vkv aingbv alvbv kudungkua rinam hv kaapa lolindo, okv kvgonv kaapa loolin majeka um vsi nyula madu.

6

¹ Nyira vdwv bunugv atu vdwa renamdonam mvnwnglo mvngdv rungubv rirungdo vla mvngto laka, vbvribolo ngonugv doin minam ha okv Pwknvyarnv gv amina yvva alvmabv minyingmirunv kaamare. ² Kristan rinu atu vdwgv nyira mvnwngngv atu vdwa miakaya rungyoka, ogulvgavbolo bunu vdwwka achiboru aingbv ridu. Vkvlgabv bunu kvvlo gv rikunam humka kaiyayabv atu vdwa rijivngji rungse ngv, ogulvgavbolo bunugv kudungkua rinamvnngnam lo paabin yala rinu atu vdwv bunugv paknam mvngjwngnv vdwv.

Doin mimurnv okv jvjvny nyitv

So vdw sum no japsar okv tamsar runglaka
³ Yvvdw ngonugv Ahtu Jisu Kristo gv gamchar
 vdwa okv ngonugv dormo gv tamsar nama akin
 madubv akusinv dormo vdwgv tamsar nama tam-
 sarla ridunv ⁴ hv oguguka chimabv okv goola
 goobor jinjinla doodunv. Hv gamchar lvkwnvlo
 minamminsubv minla larmi sidubv mvngnv, okv
 vbvrila kavtarv nga naalwkdo, yalung dumudo,
 nyarjitari modo, alvmabv mium modo, ⁵ okv jvjv
 lo dooka manv vdwa okv mongrumara mvng-
 dar manv vdwa lardv-lardv minsu monv. Bunu
 mvngdu dormo si nyitv monv lamtv ngv.

⁶ Alvdo, dormo si ngonua achialvbv nyitv modu,
 vdwlo ngonu ogugo doopvdw um nyumchi bolo.
⁷ Ngonu nyiamooku so ogugo bvnglwkla aapv?
 Ogugukama! ngonu nyiamooku sokv ogugo naala
 vngtvrikunv? Oguguka! ⁸ Vkvlgabv ngonu
 vjivbee okv dvsetvngse go doomum bolo hv
 ngonu lvgabv nyumchi kuse ngv. ⁹ Vbvritola
 yvvbunudw nyitv dubv mvngdunv hv bunu poka-
 yarka lo holu dunv okv pvchabv okv alvmanv
 mvngnamsaknam gv amin mvnamlo naatung
 koodu ho vdwv bunuam kiampwk bv pulula
 rimu-ngoomuduku. ¹⁰ Vkvlgabv morko nga pak-
 nam mv nvgwngnv alvmanv mvnwng gv koolv
 ngv. Nyi mego vbv achialvbv paanwng ku-
 nam lvkwnvbv mvngjwng lokv adu nyapvku okv
 bunugv haapok lo nvgwngnv mvngrunguya nga
 naalwkla boktakbokyak moduku.

Nyidum akin gunyi minsarnam

11 Vbvrítola no, Pwknvyarnv gv nyi ngv, svkv nvlo adu laka. Lvgvlvma lokv tarwkbak ha, pwknvyarnv aingbv rinam ha, mvngjwng nga, paknam ha, saktv ha, okv damdv ha paarung dubv rikwla ribwng tolaka. 12 Noogv mvngjwng gv jokkwsinam lo lvgvlvma bv jokcho yadubv joktoka, okv atubogv lvgabv turbwngla singnam ha paato laka; ogulvgavbolo noogv Pwknvyarnvnyi jvjvbv mvngjwng nama nyi vdwgv tvvpamlo minpa sipvdw hogv turbwngnv singnam lvgabv Pwknvyarnv nam goktoku. 13 Ogumvnwng nga singnam ha jinv Pwknvyarnv gv kaagialo, okv Pontius Pilot gvlo ninyigv mvngjwng nga minbwng jikunv Kristo Jisu gv kaagialo, ngo nam gamki dunv 14 ngonugv Ahtu Jisu Kristo gv aalwk ma dvdvlobv nam ortojinam vdwa no alvbv tvvlarilaka okv jwkjwkvrvk bv vvpv laka. 15 Chinggodogo nga Rigvdogvla okv hartv mvngji kunamv, dvbv vdwlokv Dvbv, okv Ahtu lokv Ahtu, ninyigv aakur kuse nga Pwknvyarnv gv minrwpvla vvpvnam dw lo Pwknvyarnv ninyia daklwk moreku. 16 Sika manv nw akin mwng; hv yvv gvka aanwk nyula manv lounglo doodunv. Yvka ninyia vdwloka kanv go kaama; yvka vdwloka ninyia kaakw nyulanv kaama. Mvngdv namv okv doobwngnv jwkrw ngv ninyi gvlo doobwng laka! Amen.

17 Nyiamooku so turla ririlo so gv yikungyira lo nyitvnnv vdwa gooma bvka vla mintoka, vbvritola bunugv mvngtin ha doobwng majinv yikungyira nyitv lo tinlwk mabvka, vbvritola ngonugv himpukain lvgabv ogumvnwng nga jin-

wngla jinv Pwknvyarnv gvlo tinlwk yalaka vla mintoka. ¹⁸ Alvnvnga ritoka, alvnv kudungkua lo nyitv toka, okv jinwng toka, okv kvvbi mvn-wnglo yikungyira nga ormi sidubv dobv laka vla bunua mintoka. ¹⁹ Vbvrila bunuv atubogv lvgabv yikungyira nga vvkum sire okv so vdw si bunugv aainv dw lvgabv haatin rungnv lvngtung gubv rire. Okv vbvrila bunuv jvjvnv turnama paala reku.

²⁰ Timoti, nam ogunvgo kaayataya dubv jipvdw um alvbv ringla pvto laka. Kasingkanyak okv pvchabv larmisinam nyi vdwgv mimurla “chinampanam” vla minam gaam vdwa topak laka.

²¹ Vkvlvga kvgonv um paapvku vla mintoku, okv vkvlvkwngbv bunu mvngjwng gv lamtv nga ngoomu nyatoku.

Pwknvyarnv gv anyubv aya ngv nonu mvnwng gvlo lvkobv dooming gvlaka.

ANWNV GAMLV
Tagin first Bible translation based on TEV (Good News)
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin
Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed